

इवनिंग डोगरी न्यूज़ बुलेटिन

Headlines

- उपराज्यपाल मनोज सिन्हा होरें आखेआ जे आपरेशन सिंदूर नै दुनिया गी एह साफ दस्सी दिता ऐ जे भारत इक ताकत बनियै उभरेआ ऐ।
- ट्रांसपोर्ट मंत्री सतीश शर्मा होरें मैरा मांद्रेयां ते कठार ब्लाकें दा दौरा लाइयै उत्थे भारी बरखें कारण होए दे नुकसान दा आंकलन कीता।
- अज्ज रातीं 8 बज्जियै 58 मिनटें पर चन्नै गी ग्रैहण लग्गोग, जेदा भारत च साफ तौरा पर दिक्खेआ जाई सकोग।
- त्री एशियाई जूनियर पेनकाक सिलाट चैंपियनशिप श्रीनगर च 25 कोला लेइयै 30 सितंबर तगर आयोजित कीती जा'रदी ऐ।
- मौसम विभाग नै जम्मू-कश्मीर च हौली बरखें दी पेशगोई कीती ऐ। जम्मू-श्रीनगर राश्ट्रीय जरनैली शिडक गड्डियें दी आओजाई लेई अजें बी बंद, श्री माता वैष्णो देवी जात्तरा लगातार 13में रोज बी स्थगित।

<><><><><><>

LG-Nanotechnology

उपराज्यपाल मनोज सिन्हा होरें अज्ज आखेआ जे भारत नै आपरेशन सिंदूर कन्नै दुनिया गी एह साफ दस्सी दिता ऐ जे भारत हून इक नमी ताकत बनियै उभरा'रदा ऐ। कश्मीर यूनिवर्सिटी च बेहतर जीन जीने लेई नैनो टेकनालजी सरबन्धी 5में दिन दे अंतरराश्ट्रीय सम्मेलन दे उद्घाटन समारोह गी संबोधित करदे होई एल.जी होरें आखेआ जे भारत रक्षा ते नवाचार दे क्षेत्र च इक महत्वपूर्ण शक्ति दे रूपै च उभरियै सामने आवा'रदा ऐ। उनें गलाया जे प्रधानमंत्री नरेंद्र मोदी हुंदे दृष्टिकोण नै एहू यकीनी बनाया ऐ जे नवाचार ते रक्षा आहले क्षेत्र च विकास

गी सांझेदारी नै अग्रे बदाया जा। उनें मेद बुज्झी जे एहदे लेई आई.आई.टी जनेह संस्थान महत्वपूर्ण योगदान देई सकदे ना। इस मौके पर बोलदे होई उपराज्यपाल मनोज सिन्हा होरें आखेआ।

<><><><><><>

Satish-Flood Areas

ट्रांसपोर्ट मंत्री सतीश शर्मा होरें मैरा मांद्रेयां ते कुठार दा दौरा लाया। इस दरान उनें राहत ते बचाव सरबंधी कम्में दा जायजा लैता ते हाड़ें करी होए दे नुकसान दा बी निरीक्षण कीता। मंत्री होरें कई सारी थाहरें दा दौरा लाया ते कई सारे घरें, जिनेंगी नुकसान पुज्जे दा ऐ, उंदा बी उनें जायजा लैता। उनें राई-बाई आहले क्षेत्रें, ढांचे दा बी जायजा लैता। अपने दौरे दरान सतीश होरें प्रभावित परौआरें प्रति हमददीं जाहिर कीती ते सरकार भेठा हर संभव सहायता दा भरोसा दोआया। उनें आखेआ जे सरकार पुर्णबहाली आहले कम्में प्रति बचनबद्ध ऐ। उनें जिला प्रशासन गी हिदायत कीती जे ओह नुकसान दा मौके पर जायजा लैन तां जे बिजन चिर जाए दे प्रभावितें गी मुआवजा थहोई सकै।

<><><><><><>

Lunar-Eclipse

अज्ज पूर्ण चंद्रग्रहण ऐ। एह ग्रहण पूरे भारत च साफतौरा पर दिक्खेआ जाई सकोग। एह ग्रहण दिल्ली, मुम्बई, कोलकाता ते बेंगलुरु दे कन्नै गै एशिया, आस्ट्रेलिया, पूर्वी अफ्रीका ते यूरोप दे किश हिस्सें च बी पूरी चाल्ली नजर औग। चंद्रग्रहण रातीं 8 बज्जियै 58 मिनट पर शुरू होग ते राती 2 बज्जियै 25 मिनटें पर मुक्की जाग।

<><><><><><>

Udhampur Health Advisory

भारी बरखें करी उधमपुर च कई सारे पानी दे स्रोतें गी नुकसान पुज्जा ऐ। सी.एम.ओ डॉ. अनिल मन्हास होरें इस बारै सेहत सरबंधी परामर्श जारी कीता ऐ। परामर्श च लोकें गी आखेआ गेआ ऐ जे ओह पानी गी बोआलिए पीन

तां जे पानी थमां होने आहली बमारिएं थमां बचाऽ होई सकै। जिले च सेहत टीमें आसेआ 3 लक्ख क्लोरीन दियां टिकियां ते ओ.आर.एस बंडे गए न। आकाशवाणी समाचार कन्नै गल्ल करदे होई सी.एम.ओ उधमपुर डॉ. अनिल मन्हास होरें आखेआ।

<><><><><><>

PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Silat-Championship

त्री एशियाई जूनियर पेनकाक सिलाट चैंपियनशिप 25 कोला लेइयै 30 सितंबर तोड़ी श्रीनगर च आयोजित कीती जा'रदी ऐ जेदा सरिस्ता भारती पेनकाक सिलाट फेडरेशन आसेआ पेनकाक सिलाट फेडरेशन ऑफ

एशिया पर सिलाट, खेड मंत्रालय ते जम्मू-कश्मीर खेडू परिसर दे सहयोग कन्नै कीता जा करदा ऐ। इस चैंपियनशिप च पूरे एशिया थमां इस मार्शल आर्ट दे खडारी हिस्सा लैने गितै आवा करदे ना। इस आयोजन च बक्ख-बक्ख श्रेणिएं ते वर्गे च मकाबले होडन जिंदे च टैडिंग, तुंगल्ल, गांदा ते रेगु वगैरा शामिल न जिंदे च कुड़िएं ते जागतें दे बक्ख-बक्ख मकाबले होडन। इस चैंपियनशिप दा मकसद परानिएं ते रिवायती मार्शल आर्ट्स गी बढ़ावा देना ऐ ते नोजवानें च खेडुं गी लेइयै दिलचस्पी बधाना बी।

<><><><><><>

BRO Road Construction

सीमा सड़क संगठन-बीआरओ दे प्रोजेक्ट संपर्क तैहत कठुआ जिले च लगातार बरखें करी होए दे नुकसान मगरा बसोहली थमां लेइयै बनी तगर दी शिड़कें दे टुट्टे दे हिस्से दी मरम्मत करी लैती गई ऐ। इक सोशल मीडिया पोस्ट च डिफेंस पीआरओ जम्मू होरें जानकारी दित्ती जे पिछले दिनें खित्ते च बदल फट्टने ते हाडें करी बसोहली थमां 47 किलोमीटर दे पैंडे पर टिककरी मोड़ थाहर शिड़कै दा बड्डा हिस्सा पानी च रूढी गेआ हा। एहदी मरम्मत आस्तै बीआरओ गी नमें सिरेआ शिड़क तैयार करनी पेई जेदे च अमले ते मशीनरी दी मदाद कन्नै खराब मौसम हुंदे होई बी कम्म जारी रेआ।

<><><><><><>

Weather-Traffic

मौसम विभाग नै औंदी 12 सितम्बर तोहड़ी जम्मू-कश्मीर च रूकी-रूकियै बरखा बरने ते गरज-चमक दी पेशगोई कीती ऐ। उ'आं मौसम विभाग नै इब्बी साफ करी दित्ता ऐ जे इस अवधि दरान मौसम च कोई बड्डी तब्दीली दिक्खने गी नेई लब्भोग। मौसम विभाग मूजब, अज्ज ते कल केई थाहें पर हौली बरखा बरी सकदी ऐ। जम्मू खित्ते दे किश जिलें च चिरें रातीं जां बड्डुलै सवेला बी दरम्याने दर्जे दी बरखा बरने दे असार ना। औंदी 9 शा 12

सितम्बर मझाटै प्रदेश दिएं टामीं-टामीं थाहें पर बरखा बरी सकदी ऐ। तोआई मुगल रोड ते श्रीनगर-सोनामर्ग-गुमरी सिडकै पर छडी हौली मोटर गड्डिं गी आओजाई दी खुल्ल दित्ती गेदी ऐ जिसलै के जम्मू-श्रीनगर राश्ट्री जरनैली सिडक अज्ज 6में रोज बी बंद ऐ। राश्ट्री जरनैली सिडकें सरबन्धी भारती प्राधिकरण नै अपने अमले ते मशीनें गी बरोबर कम्मै पर लाए दा ऐ तांजे सिडकै पर गड्डिं दी आओजाई तौले शा तौले ब्हाल कीती जाई सकै। लोकें गी सलाह दित्ती गेई ऐ जे ओह सिडकै गी ब्हाल करने दा कम्म मुकम्मल नेई होने तोहडी इस सिडकै पर सफर नेई करना। इस बारै होर जानकारी दिंदे होई डीएसपी ट्रैफिक उधमपुर जितेंद्र सिंह होरें आखेआ।

तोआई, भारी बरखें ते ल्हास-पस्सियां पौने करी बंद कीती गेई श्री माता वैशणो देवी जी जात्तरा गी अज्ज 13में रोज बी बंद रक्खेआ गेआ।

<><><><><><>

Rajouri-Rain

राजौरी जिले दी कई सारी थाहरें पर बडुलै थवां गै भारी बरखा होआ'रदी ऐ। इस करी जम्मू-राजौरी-पुंछ जरनैली शिडक पर केई सारी थाहरें ल्हास-पस्सियां पौने दी खबर ऐ। धवन च बी ल्हास-पस्सियां पौने दी घटना पेश आई जेदे मगरा बीआरओ नै फौरीतौर पर कार्रवाई शुरू कीती ते शिडक गी साफ करिए ट्रैफिक ब्हाल कीता। राजौरी दे ट्रैफिक मैहकमे नै आम लोकें गी हिदायत कीती जे ओह बिजन जरूरी कम्मे दे आवाजाई नेई करना। आकाशवाणी समाचार कन्नै गल्ल करदे होई राजौरी दे जिला ट्रैफिक इंस्पेक्टर खुर्शीद अहमद होरें आखेआ।

<><><><><><>

Labour-Deptt. Ramban

रामबन जिले च श्रम विकास आसेआ निर्माण कम्में च लगगे दे मजदूरें दी भलाई बेहतरी यकीनी बनाने लेई लगातार जत्त जारी न तां जे उन्दे लेई समाजी सुरक्षा, मेडिकल सहायता, बच्चें दी पढाई-लिखाई, आवास ते होरनें स्थूलतें दी उपलब्धता गी यकीनी बनाया जाई सकै। सरकार आसेआ चलाई जा'रदी विशेष योजनाएं तैहत पंजीकृत मजदूरें दे बच्चें लेई नर्सरी थमां लेइयै पोस्ट ग्रेजुएट दी पढाई लेई मदाद दी स्थूलत दा प्रावधान ऐ। एहदे

अलावा इनें मजदूरें लेई मेडिकल ईलाज लेई बी सहायता उपलब्ध कराई जंदी ऐ। इस बारे आकाशवाणी समाचार कन्नै गल्ल करदे होई असिस्टेंट लेबर कमिशनर रामबन अमित कुमार होरें आखेआ।

<><><><><><>